



KENYATAAN MEDIA

KEMENTERIAN PERDAGANGAN DALAM NEGERI
DAN KOS SARA HIDUP

No. 13 Persiaran Perdana, Presint 2,
62623 Putrajaya

No. Telefon : 03-8882 5562

No. Fax : 03-8882 5569

KPDN PELAWA MARDI SERTA TECHNOLOGY INNOVATION SUPPORT CENTRE (TISC)

SERDANG, 16 Oktober 2024 – Hari ini saya hadir untuk merasmikan Program AgrolInvest MARDI yang julung kali diadakan bersempena dengan Sambutan Hari Inovasi MARDI (HIM) 2024. Inisiatif ini merupakan platform bagi mempromosi inovasi, teknologi pertanian termasuklah produk makanan dan hasil intelek penyelidikan MARDI kepada para pemain industri dalam sektor pertanian dan agro makanan negara.

KPDN melalui MyIPO akan terus memperkukuh kerjasama dengan MARDI khususnya berkaitan pengurusan harta intelek. Antara langkah yang telah diambil adalah melalui penganjuran Program IP Care dengan Pusat Pemindahan Teknologi & Pembangunan Usahawan (TE), MARDI melibatkan penyertaan 60 orang usahawan tempatan. Program ini bermatlamat memberi pemahaman yang lebih mendalam mengenai harta intelek kepada para usahawan di bawah bimbingan MARDI termasuk melindungi jenama dan inovasi produk yang dihasilkan.

Melalui Pusat Pemindahan Teknologi & Pembangunan Usahawan (TE), MARDI juga diberi mandat untuk menjalankan aktiviti mempromosi dan memindah teknologi yang dijana kepada usahawan industri Perusahaan Mikro, Kecil dan Sederhana (PMKS) sekali gus membangunkan usahawan tekno dalam bidang industri asas tani, pertanian dan ternakan. Program di bawah Pusat TE juga, berfokus untuk memberi khidmat sokongan teknikal dan bimbingan usahawan.

Melihat kepada jaringan kerjasama ini, KPDN berhasrat menawarkan penyertaan MARDI di dalam '**Technology Innovation Support Centre**' (TISC). Program TISC merupakan pusat setempat yang dibangunkan oleh World Intellectual Property Organization (WIPO) bagi pereka cipta dari negara-negara anggota termasuklah Malaysia untuk mendapatkan akses kepada informasi teknologi dan penyelidikan terkini serta maklumat berkaitan perlindungan dan pengurusan hak harta intelek.

Melalui penyertaan MARDI dalam TISC membolehkan akses kepada perkara-perkara yang berikut:

- Akses melalui dalam talian kepada sumber paten dan bukan paten (*scientific and technical*) dan penerbitan berkaitan harta intelek;
- Bantuan dalam membuat carian dan mendapatkan maklumat mengenai teknologi;
- Latihan dalam carian pangkalan data (*database*);
- Carian atas permintaan (sesuatu yang baru, *state-of-the-art*) dan pelanggaran;
- Memantau teknologi dan pesaing-pesaing; dan
- Maklumat asas mengenai undang-undang harta perindustrian, pengurusan dan strategi, dan pengkomersilan teknologi serta pemasaran;

Melalui pelawaan ini, hasrat KPDN adalah untuk menjadikan MARDI sebagai organisasi (*host institution*) ke-26 di dalam TISC. Penyertaan dalam TISC akan berupaya membantu MARDI dengan lebih menyeluruh dalam pengurusan harta intelek setaraf dengan institusi penyelaras yang lain di Malaysia.

YB DATUK ARMIZAN BIN MOHD ALI

Menteri Perdagangan Dalam Negeri
dan Kos Sara Hidup

###